

Palajatkat Karaloukta nütüma Pablo

nümüin

TIMOTEO

Nüsakia Pablo nümüin Timoteo

1 ¹Taya, Pablo, wane chi Aluwataaushikai nütüma Jesucristo chi wa'atapajakai, otta nütüma chi Maleiwa O'tte'erüikai waya, ²ashajüshi joolu'u taya pümüin Timoteo, pia tachonkai sünainjee pünoujain nünain Cristo taküjapü'tikai achiki pümüin. Achuntüshi waneepia taya nümüin chi Washikai Maleiwa je nümüin chi Wasenyotsekai Jesucristo süpüla namüliajünjachin pia, süpüla nee'iyatüinjanain na'anasia pümüin, je süpüla naapüinjanain wane anaa pümüin.

**Achiajaanüshii na
anoujashiikana noulia**

na aküjaliikana alawaa

³Soto paa'in tü tamakat paala pümüin wanaa sümaa tojuittüin püma'anajee süpüla to'unüinjachin chamüin cha'aya Macedoniamüin. Tachuntüin kojuyatua pümüin shii'iree makatüinjachin pia cha'aya Éfeso. Otta müsia joolu'u, ayatüsü tacheküin püpüleerua makatüin pia cha'aya, süpüla püchiajaainjanain

wane wayuuirua cha'aya süpüla noo'ulaa'in suulia ekirajaa sünain alawaa, ⁴je süpüla noo'ulaa'in suulia kapülaa aa'in aküjalaa ne'e oo'ulaka süchiki ne'iruku na natuushinuukana. A'ülüjaajiraasü wayuu wanaa sümaa süsakiraajiraain sünain kasa eekai müin aka tia. Nnojotsü kasain saamüin namüin süpüla na'yataainjanain nümüin Maleiwa süka matsüin tü nanoulakat sütüma. ⁵Taluwataain pia sünain tüü, süka tacheküin püpüleerua aijiraain napülajiraa na anoujashiikana napüshua chakana cha'aya. Nounteerü naa'inrüin tia müleka wulere naa'in, müleka natüjaale saa'u tü naa'inrakat sünain anasüin nu'upala Maleiwa, je müleka laülaale naa'in sünain anoujaa nünain Cristo. ⁶Eeshii wayuu eekai akatalaa'in suulia tü nanoulakat sütüma tü alawaa ekirajünakat anain. Je tü na'ülüjaajiraakat achiki, nnojotsü kasain saamüin namüin na anoujashiikana. ⁷Kee'ireesü naa'in ekirajaa sünain tü nuluwataakat anain Moisés. Otta mayaasüje na'waataain sulu'u kekiin ma'i naya naashin, nnojotsü nayaawatüin aa'u tü nekirajakat anain.

⁸Wayaawata aa'ulu sünain anain ma'i tü nüshajakat Moisés. Acheküsü ekirajünüin shia süpüla shii'iyatüinjatüin sümüin wayuu sünain kaainjalaa'in tü kasa mojusü saa'inrakat. ⁹Na wayuu che'ojaakana amüin achiajaanaa suulia aa'inraa kasa mojusü, nnojoliishii nayain na wayuu anamiakana, naya na wayuu kaainjaraliikana, maa aka na e'rülüikana wayümüin nümüin Maleiwa sümaa moonoo'in sümaa nüünüiki süka nnojolin kojutüin nia natüma, maa aka na o'utakana naa'in nashi oo'ulaka nei je na o'unaliikana wayuwa'in, ¹⁰maa aka na wayuu a'luwajiraakana nakuaiippa sümaa wayuu jierü otta wane jierü nümaa wane toolo, maa aka na toooloyuu ama'üjiraakana sümaa toooloyuu, maa aka na oikkülüikana wayuu süpüla achepchiaa, maa aka na aküjülüikana alawaa, je maa aka na wayuu eekai müin aka tiairua sünain nayouktüin tü shiimüin tekirajakat anain, ¹¹tü nüchikikat chi O'tte'erüikakai aapünakat tamüin nütüma Maleiwa chi a'waataanakai waneepia watüma saa'u anashaatain ma'i nia.

**Anamia ma'i chi Maleiwakai
nümüin Pablo**

¹²Taapüin analu'ut nümüin chi Wasenyotsekai Jesucristo süka katsüüntpain taa'in nütüma süpüla ta'yataain nümüin. Nüneeküin taya paala süka nütüjaain saa'u sünain tekeraajeerüin waneepia tü kasa e'itaanüinjatkat tapüla. ¹³Ni'itaain taya süpüla aküjaa nüchiki sümüin wayuu süpüshua, eereje e'rüipü'üin wayümüin taya nümüin süka tanüiki je mayaashiije teipirapü'üin

na anoujashiikana. Nümülijüin taya süka anayaain tü taa'inrakat saa'in tamüin süka manoujain taya nünain. ¹⁴Anamiashaatale'eya ma'i chi Wasenyotsekai Jesucristo tamüin. Je joolu'u, saa'u sa'aniraa'itpain takuaiippa nümaa, akaaliijünüshi taya nütüma süpüla taikkale'erainjachin taa'in sünain anoujaa je süpüla alinjatüin tapüla tü tawalayuukalüirua.

¹⁵Anuu wane pütchi shiimüin süpüla kapülainjatüin saa'in wayuu süpüshua, müsü mayaa: “Antüshi Jesucristo sa'akamüin wayuu süpüla nu'tte'erüinjatüin shia süka kaainjalain süpüshua”, müsü. Otta müshia tayakai, alana'aleepü'üshi taya sünain kaainjaralin suulia wayuu süpüshua. ¹⁶Saa'u tamülijünüüichipain nütüma Maleiwa, mayaashije kaainjarai'pü'üin ma'i taya, sütüjaajeerü aa'u tü kaainjaratkalüirua süpüshua sünain nücheküin ma'i Jesucristo süpüleerua sünoujainjatüin nünain. Mayaashije kaainjalain ma'i wane wayuu, maa aka tayakai, nuuntüin Cristo nii'iratüin naa'in süpüla eenjachin nia nümaa Maleiwa süpüla ka'ikat süpüshua. ¹⁷Sükajee tüü, anashii wa'waajüle chi Maleiwakai waneepia. Nia'aya chi aluwataashikai paala sümaiwa je süpüla ka'ikat süpüshua süka matüjain ouktaa nia. Me'rujusai nia sütüma wayuu. Nia'aya ne'e Maleiwaka nümüiwa. Kasataalejese kojutüin nia sütüma wayuu süpüla ka'ikat süpüshua. Amén.

¹⁸Je joolu'u Timoteo, pia tachonkai, soto paa'in tü aküjünakat paala pümüin natüma na aapirülüikana süka nüünüiki

Maleiwa. Shia tü taluwataakat anain joolu'u pia. Müleka sotüle paa'in tü nanüikikat, ounteechi pia eejirawaa sümaa tü mojusukat, ¹⁹sümaa laülaalain paa'in süna'in anoujaa je sümaa pütüjaain saa'u tü paa'inrakat süna'in anain nu'upala Maleiwa. Otta chi wayuu eekai nnojolüütpain ein naa'in süna'in tü naa'inrakat, müleka anale, müleka mojule, amalajaajeerü tü nünoulakat. ²⁰Meechi aka nakuaippa Himeneo oo'ulaka Alejandro na mojukana anüiki nümüin Maleiwa. Ayüülajünüshii naya tatüma nüpüla Satanás süpüla nayaawatüinjatüin saa'u süna'in mojuin ma'i tü naa'inrakat.

Tü nakuaippainjatkat na anoujashiikana

sulu'u tü outkajaaleekat

2 ¹Tamüshi paala pia palajana: Anakaja pikirajüle na wayuukana cha'aya süna'in nachuntüin waneepia nümüin Maleiwa saa'u tü wayuukolüürua süpüshua. Anashii nachuntüle saa'u tü che'ojaakat sümüin tü wayuukolüürua sümaa naapiün analu'ut waneepia nümüin Maleiwa. ²Anasü müleka nachuntüle naa'u na aluwataashiikana sainküin mma je napüshua eekai laülaain saa'u wayuu. Anakaja nachuntüle nümüin Maleiwa süpüla anainjatüin mmapa'a wapüleerua, süpüla keisalainjanain waya sümüin wakuaiippa nu'upala Maleiwa, je süpüla lotüinjatüin wakuaiippa su'upala wayuu. ³Müleka waa'inrüle tüü, anasü tia je talateerü ma'i naa'in chi Maleiwakai O'tte'erüikai waya, ⁴süka kee'ireein ma'i naa'in su'tte'ennüinjatüin wayuu

süpüshua sümaa sütüjaainjatüin saa'u tü shiimüinkat. ⁵Anuu wane pütchi shiimüin: Chi Maleiwakai, nia Maleiwaka nümüiwa. Otta Jesucristo, saa'u wayuuin nia, nia nümüiwa ountaka jutatüin nütüma wapüna nünainmüin Maleiwa. ⁶Naapajiraain nikii süpüla ouktaa süpüla taashinjatüin wayuu süpüshua suulia saainjala.

Wanaa sümaa ouktüin Cristo, nii'iyatüin chi Maleiwakai sümüin wayuu süpüshua süna'in nu'tte'ereein shia. ⁷Otta tayakai, süna'in tayain wane chi Aluwataaushikai nütüma Maleiwa, aneekünüshi taya nütüma süpüla taküjainjatüin sümüin wayuu süpüshua nüchiki Cristo, chi O'tte'erüikai. Shiimüin tü tamakat joolu'u pümüin, nnojotsü alawaain. E'itaaushi taya nütüma süpüla tekirajüinjatüin tü wayuu “gentilekalüürua” süna'in tü shiimüinkat süpüla sünoujainjatüin nünain Cristo.

⁸Otta na toloyuukana chakana sulu'u süpüshua tü outkajaaleekat sainküin mma, anashii müleka nachuntüle waneepia nümüin chi Maleiwakai. Je wanaa sümaa nayalerüin najapü süna'in na'waajüin Maleiwa, anakaja nakatalaale suulia kaainjalaa sümaa nnojoliin naashichijaaajiraain je sümaa nnojoliin na'ülüjaajiraain.

⁹⁻¹⁰Otta müshi'iya na jieyuu a'waajakana chi Maleiwakai, tü anainjatkat atüma nayolojo su'upala wayuu, nnojolüinjatü sükajeejatüin na'anaain süka kuluulu kojutkat ma'i, nnojolüinjatü sükajeejatüin aa'inraa kasa süna'in na'wala, je nnojolüinjatü sükajeejatüin na'anaain che'esaa je aülüijanaa eekai kojutüin ma'i. Tü e'nnajatkat nanain na jieyuukana,

shianjatü tü kamanewaakat sünain aa'inraa kasa anasü sümüin wayuu süpüshua.

¹¹ Je na jieyuukana, wanaa sümaa jutkatüin wayuu sulu'u tü outkajaaleekat süpüla ekirajünaa, anashii müleka eere naa'in süpüla naashajaala na laülaashiikana sümaa nnojolüin nasakijain soo'opünaa tü ekirajünakat anain. ¹² Je nnojotsü tacheküin napüleerua nekirajüin na jieyuukana wayuu sulu'u tü outkajaaleekat sümaa laülaainjanain naya naa'u na toolyuukana. ¹³ Süka jamüin, sümaiwa paala nukumajaiwa'aya wayuu Maleiwakai, akumajünüshi Adán palajana oo'ulaka Eva nüchikijee. ¹⁴ Je tü anoujakat tü alawaa akijünakat nütüma Satanás, shia Eva, nnojoiishi niain Adán. Je wanaa sümaa sünoujain tü alawaakat, kaainjalasü shia nuulia Maleiwa. ¹⁵ Na jieyuukana eekai jemeyulüin sümaa jo'uu, acheküshii talatüin naa'in sünainjee. Je tü anasükat süpüla naa'inrüinjatüin na jieyuukana napüshua, shia ayatüin naya sünain anoujaa, sünain alin wayuu süpüshua napüla, sünain nakatalaain suulia kaainjalaa, je sünain naa'inrüin kasa anasü su'upala wayuu.

Nakuaippainjatkat na laülaashiikana sulu'u tü outkajaaleekat

3 ¹ Anuu wane pütchi shiimüin, müsü mayaa: “Chi wayuu eekai kee'ireein naa'in laülawaa napüleerua na anoujashiikana sulu'u tü outkajaaleekat, anashaatasü ma'i tü nüchekakat nüpüleerua”, müsü. ² Chi laülaashikai sulu'u tü outkajaaleekat: Niainjachi chi eekai lotüin akuaippa no'upala

na nuwalayuukana. Müleka ka'wayuusere nia, waneesüinjatü ne'e nu'wayuuse. Niainjachi chi eekai laülaain aa'in süpüla kojutüinjachin sütüma wayuu. Niainjachi chi eekai kapülain naa'in ni'iyou. Niainjachi chi eekai atüjain süpüla ekirajaa wayuu. ³ Nnojoiishi wayuujachin epertüü nia. Nnojoiishi wayuujachin katkaarai nia. Nnojoiishi wayuujachin ka'ülüjaaraai nia, alu'ujasa wayuujachin anamiamia. Nnojoiishi kachiiruainjachin aa'in washirtüü. ⁴ Niainjachi chi eekai laülaain süpüleerua nüpüshi kepiakat nümää. Je müleka kachonle nia, kojutüinjatü nünuiki sütüma nüchonni. ⁵ (Süka jamüin, müleka matüjainre nia laülawaa süpüleerua tü nüpüshikalüüria, çjataaaleechi nia süpüla laülawaa napüleerua na nüpüshikana Maleiwa?) ⁶ Nnojolinjachi wayuujin jekechi nia sünain anoujaa suulia yaletayaajüin nukuaippa no'upala na nuwalayuukana. Je kasalajaneerü tia nüümüin nütüma Maleiwa, maa aka paala chi Yolujaakai sünain ajuittinnaa nuulia Maleiwa saaliijee yaletayaain nukuaippa. ⁷ Chi laülaashikai sulu'u tü outkajaaleekat, müleka nnojorule lotüin nukuaippa su'upala wayuu eekai manoujain, eejeechi süpüla naa'inrüin tü nüchekakat chi Yolujaakai nüpüleerua, tü japüijeechikat atüma chi wayuukai.

Nakuaippainjatkat na aa'inmajülüikana

sulu'u tü outkajaaleekat

⁸ Aka'aya na “diáconokana”, na aa'inmajülüikana kasa sulu'u tü

outkajaaleekat, nayainjana na eekai kojutuün sütüma wayuu süka shiimüün nakuaippa su'upala. Nnojoliinjana wayuüin eperülii naya. Nnojoliinjana kachiiruain aa'in washirüü. ⁹Anakaja müleka ichere naya sünain tü shiimüün nii'yatakat Maleiwa namüün süpüla natüjaainjatüün saa'u tü naa'inrakat nayakana sünain anasüün nu'upala Maleiwa. ¹⁰Je süpülapünaa ni'itaanüinjachin wane wayuu sünain tü a'yatawaakat, anakaja müleka ni'nnüle akuaippa palajana. Müleka lotüleje'e nukuaippa, anashi ni'itaanüle.

¹¹Aka'aya na jieyuu aa'inmajülikana, nayainjana na eekai kojutuün sütüma wayuu sünainjee nnojoliin perulaayuuüin naya, na eekai laülaain aa'in sünain aa'inraa waneepia tü e'itaanakat apüla naya.

¹²Je chi aa'inmajüikai, müleka ka'wayuusere nia, waneesüinjatü nu'wayuuse. Niainjachi eekai nuuntüün laülawaa süpüleerua nüpüshi kepiakat nümaa. Je müleka kachonle nia, kojutuünjatü nünüiki natüma. ¹³Chi eekai anain atüma tü a'yatawaakat, kojuteechi natüma na nuwalayuukana. Je nnojoleechi mmolüin seema aküjaa sümüün wayuu nüchiki Jesucristo chi nünoujakai anain.

¹⁴Timoteo, o'uneeshi ma'i taya maalü püma'anamüün. Otta müsia joolu'u, tashajüün tü karalouktakat pümüün. ¹⁵Müleka kaka'iyale taya, pütüjaaeerü aa'u sütüma tü tashajakat pümüün sünain jamüünjatüün pütüma nakuaippa na nüpüshikana Maleiwa sulu'u tü outkajaaleekat cha'aya. Waya anoujashiikana nünain

chi Maleiwakai matüjainkai ouktaa, e'itaanüshii waya süpüla waa'inmajüünjatüün tü pütchi shiimüinkat naapakat wamüün Maleiwa.

¹⁶Tü shiimüün nii'yatakat chi Maleiwakai wamüün, anashaataleesia ma'i. Anuu tü pütchi ashajünakat süchiki:

Eweetüshi Jesús sünain wayuüin nia.

Lotüsü ma'i nukuaippa saa'u niain Maleiwain.

E'nnüshi nia sütüma tü aapieekalüirua nüma'anajeejatkat Maleiwa. Aküjüna achikichi nia sümüün wayuu sainküün mma.

Anoujüna anainchi nia sütüma wayuu wainma.

Ayalennüshi nia iipünaamüün eemüün chi Maleiwakai.

Nukuaippainjatkat Timoteo sünain ekirajaa na anoujashiikana

4 ¹Aashajaashi chi Naa'inkai Maleiwa paala sümawai naka na nünüikimaajanakana Maleiwa sünain aküjaa sümüün wayuu süchiki tü alateetkat so'uweena tü ka'i alü'ütakat süpüla saja'ttüünjatüün tü kasakat süpüshua. Naküjain süchiki wane wayuuirua ayouktüünjatkat tü sünoulakat süpüla jüüjüünjatüün sümüün wane alawaa ekirajünakat sütüma yolujaa. ²Je maa'ulu yaa, na wayuu eekai nekirajüün sünain kasa eekai müün aka tia, piama o'upünaachii je aküjashii naya alawaa. Sükajee jüüjüünapain naya nüümüün Satanás, isasü nachiki nayaawatüünjatüün saa'u tü nekirajakat anain sünain mojuin ma'i shia nu'upala Maleiwa. ³Nekirajüün sünain

mojuin ka'wayuusee. Je nekirajüin süna'in ein wane eküülü eekai mojuin süpüla ekünaa, ja'itasü e'ítaaushin shia nütüma Maleiwa süpüla ekünaa. Shiimüin süna'in taashin waya süpüla weküinjatüin eküülü eekai ein ne'e sümaa waapiin analu'tut nümüin Maleiwa saa'u, süka wanoujain nünain je süka watüjaainapain saa'u tü shiimüinkat. ⁴Anasü süpüshua'ale tü kasa nükumajakat chi Maleiwakai süpüla waapiinjatüin analu'tut saa'u. ¿Jamaka'a wayouktüinjatka'a shia? ⁵Müleka eere waa'in süna'in nünüiki Maleiwa je müleka wachuntüle nümüin, watüjaajeerü aa'u tü waa'inrakat müleka anale je müleka mojule.

⁶Otta piakai Timoteo, müleka pikirajüle na puwalayuukana waneepia süna'in tü taküjakat pümüin, talateerü ma'i naa'in Jesucristo chi kaneekajalakai pia süpüla a'yatawaa nümüin. Otta na puwalayuukana, natüjaajeechi aa'u pia süna'in ichein pia süna'in tü pütchi shiimüin ekirajünakat anain pia. ⁷Jalia pia suulia kapülain paa'in tü aküjalaa naatajatü aküjünakat sütüma wayuu mojutkat atüma Maleiwa, süka nnojolüin kasain saamüin namüin na anoujashiikana. Shia anaka alu'u müleka kachiiruule paa'in keisalaa sümüin pukuaippa nu'upala Maleiwa. Müinjachi aka pia naa'in wane wayuu ayoujiraai süna'in niki'rajaain waneepia süpüla kalainjachin nia. ⁸Tü nükanajeekat chi ayoujiraikai, anasiyaaje motso'o ne'e. Otta müleka keisarale pia sümüin pukuaippa nu'upala Maleiwa, akaaliijüneechi pia sütüma maa'ulu yaa je talateechi chi Maleiwakai pümaa eepa pia

nümaa so'uweena wane ka'i. ⁹Shiimüin tü taküjaitpakat pümüin süpüla kapülainjatüin saa'in wayuu süpüshua. ¹⁰Je joolu'u, a'yataashii waya süka süpüshua waa'in, süka watüjaain naa'u chi Maleiwa katakai atüma so'u wayuu süna'in nuuntüin nu'tte'erüin wayuu süpüshua. Chi eekai nünoujain nünain Cristo, shiimüin nu'tte'enneechin nütüma.

¹¹Anashi pikirajüle na anoujashiikana süna'in tü taküjakat pümüin sulu'u tü karalouktakat, je puluwataa naya süna'in nekettaajüin shia. ¹²Anakaja nnojorule kasajatüin pümüin eekai pülain naa'in puulia saalii jintülin pia noulia. Shia anaka alu'u müleka keisarale pia sümüin pukuaippa su'upala wayuu süpüla süshatüinjatüin pukuaippa: maa aka tü paashajaakat achiki, maa aka tü kachiiruakat paa'in, maa aka tü saaliikat wayuu püpüla, maa aka tü pünoulakat, je maa aka tü paa'inkat süna'in wulein. ¹³Je süpülapünaa tantüin pünainmüin, anakaja ayatüle pia süna'in aashaje'eraa tü karaloukta nüchikimaajatkat Maleiwa sulu'u tü outkajaaleekat. Anashi ayatüle pia süna'in ekirajaa wayuu süna'in nünüiki Maleiwa süpüla nayaawatüin saa'u. Anashi ayatüle pia süna'in eme'ejaa naa'in shii'iree noonoweein sümaa. ¹⁴Soto paa'in wanaa sümaa ne'ítaain najapü na laülaashiikana paa'u sümaa saapünüin wane pütchi pümüin nütüma chi aapirüikai süka nünüiki Maleiwa. Paa'inmaja tü atüjaakat aapünakat paala pümüin nütüma chi Naa'inkai Maleiwa so'u ka'ikat tia.

¹⁵Soto paa'in tü taluwataaitpakat anain pia süpüla paa'inrüinjatüin shia süka süpüshua paa'in. Müleka tütüle pia süna'in pi'yataain nümüin

Maleiwa, nayaawateechi aa'u pia na puwalayuukana sünain laülaain paa'in sünain anoujaa. ¹⁶Ee paa'in sünain tü pukuaippakat suulia paa'inrajuün kasa mojusü je suulia pikirajuün sünain kasa naatajatü. Müleka püchecherüle paa'in sünain tüü, o'tte'enneena na aapajakana püntüiki. Je müshia piaka'iya, o'ttaweechi.

Nakuaippainjatkat na anoujashiikana namüin

na oukta a'wayuusechiikana

5 ¹Müleka püchiajaale wane anoujashi eekai laülaaichin, nnojo paa'ayajaain naa'in. Pime'eja naa'in maa aka püshi pümüin. Otta na jima'aliikana, müinjana aka naalii wane pimülia pütüma. ²Je na jieyuu laülaainakana, müinjana aka saalii püi pütüma. Je na majayünnüükana, müinjana aka saalii wane püshunuu pütüma sünain wulein paa'in waneepia no'upala.

³Anakaja kojutule pütüma na jieyuu eekai ouktüin na'wayuuse. Müleka nnojorule wane wayuu aa'inmajüinjatkat shia, anasü müleka saa'inmajünüle sütüma tü anoujasükaltüirua. ⁴Otta müleka kachooinre je kalüinre shia, naya aa'inmajüinjanaka shia, süka anain nümüin Maleiwa tia. Je anakaja naa'inmajüle shia süpüla nawalaajüinjatüin tü shi'yataainkat namaa paala. Shia talataka atüma naa'in Maleiwa tia. ⁵Alu'ujasa tü wayuu oukta a'wayuuset eekai sümüiwa'ain sünain makaaliijuuin shia, shiain ne'e sa'atapajüin nümüliajüin Maleiwa. Achuntüsü waneepia nümüin sa'wai, so'uka'i

süpüla naa'inmajüinjatüin shia.

⁶Otta tü wayuu oukta a'wayuuset eekai saa'inrüin waneepia tü süchekakat ne'e sümüiwa, mayaasüje katsüinyüliain shia süpüla a'yatawaa nümüin Maleiwa, nnojolüitpa kasajatüin sümüin tü nüchekakat süpüleerua.

⁷Anashi müleka puluwataale na anoujashiikana sünain tü taküjaitpakat pümüin, suulia mojujain sünüiki wayuu namüin saa'u nnojolüin naa'inmajüin tü napüshikat eekai ouktüin su'wayuuse. ⁸Wane anoujashi, müleka nnojorule naa'inmajüin na nüpüshikana, na kepiakana nümaa maa aka eekai nnojoliin kepiain nümaa, niyoktüinja'a, sükajee tia, tü nünüikikat Maleiwa ekirajünakat anain nia. Mojuleesia ma'i tü naa'inrakat nuulia wane manoulasai.

⁹Je tü wayuu oukta a'wayuuset aa'inmajünüinjatkat natüma na anoujashiikana, shiainjatü eekai laülaain suulia aippiirua shikii juya suuyase je shiainjatü eekai mama'ülain kataiwa'aya no'u su'wayuuse. ¹⁰Anasü müleka shi'nnaajünüle sünainjee aa'inraa waneepia kasa anasü: maa aka saa'inmajüin süchooin, maa aka kapülain naa'in na shi'iyookana, maa aka su'lojooin noo'ui na anoujashiikana, maa aka sümüliajüin eekai müliain, je maa aka saapajiraain sukuaiippa süpüla saa'inrüinjatüin wainma kasa anasü sümüin wayuu.

¹¹Otta wane wayuu oukta a'wayuuset eekat nnojoyülüinya ekettaajüin suuyase, nnojolüinjatü aa'inmajünüin natüma na anoujashiikana. Süka jamüin, ein süpüla sükulajaweerüin aa'in

sünain ma'wayuusein shia, je kee'ireejeerü saa'in ka'wayuusee.
¹²Je ka'wayuusepa, nnojoleerü saal'in sünain a'yatawaa nümüin Cristo, maa aka tü sümakat paala sünain pansaain sünüiki. Je kasalajaneerü sümüin tia nütüma Maleiwa. ¹³Müleka saa'inmajünüle tü wayuukot natüma na anoujashiikana, eesü süpüla ki'reerüin sünain shukulaa. Waraitta'ain meerü sainküin shipia wayuu sünain eperulajaa sümaa yootüin süchiki tü kasa nnojotkat anain süpüla saashajawaa.
¹⁴⁻¹⁵Mojusü ma'i taa'in sükajee een wayuu oukta a'wayuuset eekat nayouktüin tü nüchekakat chi Maleiwakai napüleerua süpüla noushikajaan nüchierua Satanás. Wane wayuu oukta a'wayuuset eekat nnojoyülüin aippiruain shikii juya suuyase, anasü saa'in tamüin müleka ka'wayuuser shia süpüla kachooinjatüin sümaa saa'inmajüinjatüin na süpüshi kepiakana sümaa. Müleka saal'inrüle tia, nnojoleerü mojuin nanüiki na manoujainsaliikana sümüin.
¹⁶Tamüshi paala pia tachikua: Wane wayuu anoujasü, anasü müleka saa'inmajüle tü süpüshikat eekai ouktüin a'wayuuset. Nnojotsü anain müleka süchüntüle namüin na anoujashiikana sulu'u tü outkajaaleekat süpüla nayainjanain aa'inmajüin tü süpüshikat. Naya e'itaanaka na süpüshikana süpüla nayainjanain aa'inmajüin shia. Na aa'inmajününjanakana natüma na anoujashiikana, nayainjana na eekana namüiwa'ain sünain makaaliujuin naya.

Nakuaippainjatkat na anoujashiikana namüin

na laülaashiikana

¹⁷Na laülaashiikana napüleerua na anoujashiikana sulu'u tü outkajaaleekat, saa'u tütüin naya sünain ekirajaa wayuu sünain nünüiki Maleiwa, anasü shipiantünüle nawalaajia saa'u tü na'yataainkat. ¹⁸Shia tü ashajünakat achiki sulu'u tü nüchikimaajatkat Maleiwa sünain maa: “Wanaa sümaa shi'yataain tü jüsachiratkat sünain asaichijaa tü jüpünajüinkat, anasü müleka nnojorule keimataalajain shia jütüma, süpüla shiküinjatüin süpüshi tü süsaichijüinkat”, müsü. Oo'ulaka wane ashajuushi, müsü maya'aya: “Chi a'yataakai, acheküshi nuwalaajünün”, müsü.
¹⁹Müleka “kaainjalashi chira laülaashikai”, pümünüle sütüma waneesia wayuu ne'e, nnojotsü kasajatüinjatüin pümüin. Alu'usa müleka pümünüle natüma piamashii je apününshii wayuu eekai natüjaain naa'u chira laülaashikai, anakaja paapajüle nanüiki.
²⁰Je müleka shiimüinre sünain kaainjalain nia, anakaja püchiajaale nia no'upala na anoujashiikana napüshua suulia naa'inrajüin nayakana kasa eekai müin aka tia.

Wane pütchi nümüin Timoteo

²¹Timoteo, te'itaanin joolu'u tü pütchikat püpüleerua no'upala chi Maleiwakai oo'ulaka Jesucristo oo'ulaka tü aapiee aneekajuushikalüirua: Paa'inra süpüshua'ale tü taluwataaitpakat anain pia sünain nnojolinjachin katata'awain saalii wayuu pütüma.

²² Je süpülapünaa peenaküin wane wayuu süpüla wane a'yatawaa sulu'u tü outkajaaleekat sümaa pi'itaa'in pajapü naa'u, anakaja pütüjaale naa'u müleka tütüle nia süpüla tü a'yatawaa. Je jalia pia suulia wanaawain paa'in sümaa tü kasa mojusü naa'inrakat wane kaainjarai. Shia anaka alu'u müleka wulere paa'in waneepia no'upala na anoujashiikana.

²³ Tawalachee, taapa achikichi pia süna'in ayuulin pejeewa. Suulia alin püle'e sütüma tü eküülü pikakat, anasü saa'in tamüin müleka nnojorule püsüin wüin ne'e sümüiwa. Anasü püsüle yootchon wiino.

²⁴ Tamüshi paala pia wane kasa: Eeshi wayuu eekai e'nnaajünüin süna'in kaainjaralin. Kasalajaneerü nümüin naainjala. Oo'ulaka eeshi eekai kaainjalain sümaa nnojolüin nütüjaanüin aa'u sütüma wayuu. Atüjaaneechi aa'u so'u wane ka'i.

²⁵ Akaajaa eeshi wayuu eekai e'nnaajünüin süna'in aa'inraa kasa anasü. Oo'ulaka eeshi eekai matüjaajuuin saa'u tü anasü naa'inrakat. Atüjaaneechi aa'u so'u wane ka'i.

Nakuaippainjatkat na achepchieekana

6 ¹ Otta na puwalayuukana eekai süchepchiain wayuu, anakaja kojutüle natüma na kachepchiakana naya, suulia mojujain sünüiki wayuu nümüin Maleiwa je sümüin tü wekirajakat anain. ² Je na eekai süchepchiain wayuu anoujasü, nnojoliinjana oo'ulain suulia kojutüin natüma saa'ujee nawalain nia. Shia anaka alu'u müleka tütüle ma'i naya süna'in a'yatawaa nümüin sümaa alin nia napüla süka anoujashin chi na'yataakai amüin.

Achiajaanüshii na anoujashiikana suulia

kachiiruaa aa'in washirüü

Nnojo motüin paa'in pikirajaa wayuu süna'in tü taküjakat pümüin sümaa pime'ejüin naa'in süna'in tü taluwataakat anain. ³⁻⁴ Na wayuu eekai nekirajüin süna'in kasa naatajatü, yaletayaasü nakuaippa su'upala wayuu mayaasüje'e maa'awain tü nekirajakat anain. Shia sükajee nnojolüitpain kapülain naa'in tü nikirajakat anain chi Wasenyotsekai Jesucristo oo'ulaka tü shiimüinkat wekirajakat anain noo'opünaa. A'ülüjaweeshii ma'i naya süka natüjaain ma'i naajüin.

Müshi'iya na wayuu kapülakana aa'in nanüiki süna'in na'ülüjaajiraain süna'in tü ekirajünakat anain. Je sükajee tia, achunjasü naa'in sümüin wayuu. Mojusü nanüiki sümüin wayuu je nayoujain wayuu. ⁵ Aashichijaaajiraashii ma'i naya sümaa jülüjain naa'in tü kasa mojusükat waneepia. Süka nnojolüitpain nayaawatüin saa'u jaralüin shiimüin, washireena naya saa'in namüin müleka keisarale nakuaippa.

⁶ Eekai keisalain sümüin nakuaippa nu'upala Maleiwa, müleka talatüle naa'in sümaa tü nüchekakat Maleiwa nüpüleerua, anashaatasü ma'i tia. ⁷ Jemeishii waya sümaa makoroloin. Je ouktapa waya, nnojoleerü kasain walü'üjain. ⁸ Je maa'ulu yaa, müleka eere tü wekakat, eere washe'in, talatüinjana waya sümaa tia. ⁹ Otta chi wayuu eekai kachiirua'in naa'in washirüü, naa'inreerü tü nüchekakat chi Yolujaakai nüptüleerua süna'in

kee'ireein ma'i naa'in kasa mojusü waneepia. Amülouijeerü tü nukuaippakat sükajee tia. ¹⁰Chi wayuu eekai ni'itaain naa'in sünnain neerü, naa'inreerü kasa eekai ein shii'iree washirüinjachin nia. Eesü wayuu anoujasü eekai sükatalaain suulia tü sünnoulakat sünnainjee tia. Je sütüma tia, mojushaatasü ma'i naa'in.

**Tü pütchi ni'itaakat Pablo
nüpüleerua Timoteo**

¹¹Timoteo, saa'u shiain kee'ireein paa'in tü nüchekakat chi Maleiwakai püpüleerua, anakaja müleka paa'inmajüle pukuaippa suulia aa'inraa kasa mojusü. Shiainjatü kachiiruaka paa'in kasa anasü: maa aka paa'inrüin tü nuluwataakat anain Maleiwa, maa aka keisalain pia sümüin pukuaippa nu'upala Maleiwa, maa aka paa'inmajüin tü pünoulakat, maa aka alin püpüla wayuu, maa aka püchecherüin paa'in sünnain anoujaa, je maa aka kamaneein pia sümüin wayuu. ¹²Anakaja müleka katsüinre paa'in sünnain anoujaa, maa aka naa'in wane wayuu kalaain süpüla ayamülaa chi ni'ipolokai. Soto paa'in tü ka'i püküjakat o'u süchiki tü pünoulakat sümüin wayuu wainma wanaa sümaa peenakünüin nütüma chi Maleiwakai süpüla eenjachin pia waneepia nümaa. Anakaja masütaajule pia sünnain tü nüchekakat Maleiwa püpüleerua. ¹³Paa'inra tia nu'upala Maleiwa, chi katakai atüma so'u kasa süpüshua, je nu'upala Jesucristo, chi anakai anüiki paala nu'upala Poncio Pilato. ¹⁴Paa'inra tü nüchekakat Maleiwa püpüleerua wane'ere'eya niweetaalepa chi Wasenyotsekai Jesucristo.

¹⁵Ee'iyatüneechi nia nütüma chi Maleiwakai so'uweena tü ka'i e'itaanatütükalia nütüma süpüla niweetaajachin. Anakaja wa'waajüle joolu'u chi Maleiwakai süka niain aluwataain nümüiwa saa'u kasa süpüshua je süka niain alana'aleein sünnain anain noulia napüshua na aluwataashiikana saa'u mma. ¹⁶Nia ne'e waneeshika'aya sünnain matüjain ouktaa. Matüjainsat arütkawaa wayuu nünainmüin süka kawaralain ma'i nü'ütünaa. Nnojotsü ein wayuu e'rakat chi Maleiwakai süka matüjain nia e'nnaa. Kasataalejese kojutshaatain ma'i nia sütüma wayuu wainma süpüla ka'ikat süpüshua, süka pülashaatain ma'i nia je süka laülaain nia waneepia. Amén.

¹⁷Püma nümüin chi wayuu eekai washirüin sünnain nnojolinjachin pülain naa'in nuulia Maleiwa je sünnain nnojolüinjatüin ni'itaain naa'in sünnain tü washirüükat. Süka jamüin, tü washirüükat, nnojotsü süpülain ka'ikat süpüshua. Chi kachiiruainjachikai naa'in, niainjachi Maleiwa nümüiwa, süka naapüin wamüin süpüshua tü che'ojaakat wamüin, süpüla talatüinjatüin waa'in nümaa. ¹⁸Puluwataa naya sünnain aa'inraa waneepia kasa anasü sümüin wayuu. Je püchiajaa naya suulia ji'iyee, süpüla asülajülüinjanain naya sümüin wayuu eekai müliain. ¹⁹Je nayaawateerü aa'u sünnain shiimüin eejeenain naya nümaa Maleiwa chaa iipünaa süpüla ka'ikat süpüshua. Je so'uweena wane ka'i, walaajeena naya saa'u tü naa'inrakat nütüma Maleiwa.

²⁰Timoteo, anakaja taso'irüle paa'in sünnain paa'inmajüin tü

pütchi shiimüin ekirajünakat anain
 pia suulia pikiraja'alayaa'in pütchi
 naatajatü. Anakaja nnojorule
 kasajatüin pümüin tü shikirajakat
 anain tü wayuu mojutkat
 atüma Maleiwa. Jalia pia suulia
 kapülainjain paa'in tü alawaa
 nekirajakat anain na wayuukana,

mayaasüje na'waataain sulu'u kekiin
 ma'i naya saa'in namüin. ²¹ Eesü
 eekai sünoujain tü na'alainkat
 sümaa suu'ulaain suulia tü
 sünoulakat sükajee tia.

Tachuntüin joolu'u nümüin chi
 Maleiwakai süpüla nii'iyatüinjatüin
 na'anasia waneepia pümüin.